



## **Tusagassiorfitsigut nalunaarut**

**31. marts 2020**

### **ICC-ip ilisimatitsisarnissanik peqataatitsisarnissanillu piumasagaatit**

#### **Erseqqissaatigai**

Sermitsiaq/AG marsip 25-anni saqqummersoq naapertorlugu Australiamiut aatsitassanik misissuineramik ingerlatsiviat *Greenland Minerals Ltd. (GML)* – siusinnerusukkut *Greenland Minerals and Energy GME*-mik taaguutillip VVM, tassaasoq aatitassanik qaqutigootunik uranitalinnillu piaanissami avatangiisinut sunniutissaannik naliliineq pillugu nalunaarusiamik nutartikkamik marsip naanerani imaluunniit aprilip allartinnerani Naalakkersuisunut tunniunneqarnissaa ilimasaaruteqarpoq. Kuannersuarni aatsitassanik qaqutigootunik uranitalinnillu piialersaarnermi avatangiisinut sunniutissai aammalu inuiaqatigiinnut ataavarsinnaanermut sunnitissai pillugit nalilersuinerit (VSB) pineqarput.

ICC-ip suliaq malinnaaffigaa, pingaartumillu savaatillit amerlasuut inuussutissarsiutimik siunissaa pillugu erumassutaat ersarissut maluginiarlugit.

Narsami eqqaanilu innuttaasut tamarmik tassaasariaqarput aalajangiisoqartinnagu VVM-imik VSB-millu misissuinerit inernerit pillugit ilisimatinneqatussat peqataatinneqartussallu siullerpaat.

Siusinnerusukkut savaatillit kattuffiata Savaatillit Peqatigiit Suleqatigiissut Qaqortumi ataatsimeersuarneranni ilaasortat amerlanerussuteqartut ammaannartumik itersarsualiornikkut aatsitassanik qaqutigootunik uranitalinnillu piaanissamik pilersaarut akerliuffigaa. Kattuffimmi ilaasortat amerlanerussuteqartut, Kalaallit Nunaanni inuussutissanik pilersueqataanermik innarlerneqarsinnaanerat erumassutigaa: ”*Erseqqippormi aammalu uppernarsarneqareerpoq nunamit uranitalinnit piaanissat naassorissaanerullu iluani nioqqutissiornerit sanileriillutik ingerlanneqarsinnaanngitsut.*”

Nunat inoqqaavisa pisinnaatitaaffii pillugit Naalagaaffiit Peqatigiit nalunaarutaat (UNDRIP) aamma ILO-mi aalajangersakkat nr. 169-miittut pillugit aalajangersakkat malinneqarnissaat ICC-p matumani aallaavigai. Pisinnaatitaaffik pineqartoq tassaavoq, allanit qulangersimaneqanngitsumik siumoortumik eqqortunillu pasissutissinneqartarnissamik pineqartut pisinnaatitaanerat maleqqissaarneqartariaqartoq. Taamaasillutik pineqartut pilersaarutinut taama ittunut akuersisinnaanerminni itigartitsisinnaanerminnilu ersarissunik qularnanngitsunillu tunngavissaqarsinnaaqqullugit.

Taamaammat ICC-ip sakkortuumik erseqqissaatigaa GML-ip Naalakkersuisullu Naalagaaffiit Peqatigiinnit naalagaaffiillu akornanni aalajangersakkat naapertorlugit suliaq ingerlattariaqaraat, inuiaqatigiinnilu pineqartut peqataatilluinnartariaqarlugit. Taamaasilluni savaatillit saniatigut aalisartut, piniartut piaaffissallu Kuannersuit qanittuani najugaqartut tamarmik peqataatinneqarnissaat qulakkeeqquneqaqqullugu.

ILO-mi aalajangersagaq nr. 169-mi kiffaanngissuseqartumik sioqqutsisumik eqqortunillu paasissutissinneqarnikkut pilersaarummut akuersisinnaanermik naaggaarsinnaanermillu pisinnaatitaaffik malinneqartariaqarpoq, taamaattoqanngippammi innuttaasut pisinnaatitaaffiik suussupaginninneq akuerineqarsinnaanngilluinnarmat.

Erseqqisaatigisariaqarpara innuttaasut attorneqartussat siumoortumik qulangersimaneqanngitsumillu pisussat pillugit ilisimatinneqarnissaat isumasiorneqartarnissaallu pingaaruteqarluinnarmat. Taamaaliornikkut aatsaat inuttaasut sunniuteqarnissaat anguniakkanillu ilisimaarinninnissaat qulakkeerneqassammata.

Savaatillit ernumassutigaat nunat savat neriniarfii narsaatimillu qinngornernit ulorianartunik mingutsinneqarnissaat. Aaliasartut piniartullu ernumassutigaat kangerluit aalisarfigisartakkamik aatsitassarsiornermit eqqakkaniit pujoralanniillu qinngornernik uloriartunik mingutsinneqarnissaat. Narsami eqqaanilu najugaqartut avatangiisit minnerunngitsumillu erngup navianarluinnartumik mingutserneqarnissaat annertuumik ernumassutigaat.

Hjalmar Dahl

Siulittaasoq - Præsident

ICC Kalaallit Nunaat - Grønland